

第七三三册

經濟彙編

樂律典

樂律總部

(卷)
二四一三

古今圖書集成

中華書局影印

古今圖書集成

卷一百一十五

古今圖書集成

中華書局影印

欽定古今圖書集成經濟彙編樂律典
第二十四卷目錄

樂律總部彙考二十四

宋樂章五

樂律典第二十四卷

樂律總部彙考二十四

宋樂章五

紹興祭風師六首

迎神欣安

夫物細縕神氣撓之誰歟其司維南之箕俶哉明庶
我祀維時我心孔勞神其下來

初獻升降盥洗欽安

神哉沛矣厥靈載揚揚靈如何剡剡皇皇我其承之
繩繩齊莊往從鬱人爰挾斯芳

奠幣容安

物之流形甚畏瘡癘八風平矣嘉生以遂絲縷之積
有量斯幣惟本之報匪物之貴

酌獻雍安

我求於神無臭無聲神之燕享惟時專精大磬在列
櫛燎在庭侑我桂酒娛其以聽

亞終獻

禮有三祀儀物視帝神臨消搖壽敢跛倚重觴載申

百味孔旨神今樂康答我以祉

送神

曲同

荃其止乎祀祀其容奄橫四海蹇莫之窮時不驟得
禮焉有終荃其行乎余心懔懔

雨師雷神七首

迎神欣安

衆萬之託動之潤之昭格孔時維神之依洽然後先
肆我肯顧是耶非耶紛其來下

初獻盥洗升降欽安

言言祠宮爰考我禮維西有豐維東有洗爰潔爰滌
載薦其體神在何斯匪遠具邇

奠幣容安

需兮隱兮蹇其陰威相我有終胡寧不知我幣有陳
我耶斯珪豈維有陳於以奠之

雨師位酌獻雍安

山川出雲裔裔而縷載雲載濛其德乃薄自古有年
胡然莫祖無簡我觴無怠我俎

雷神位酌獻

曲同

瞻彼南山有虺其出維蟄之奮維癘之息眷焉顧饗
在夏之日觴豆匪報皇忍忘德

亞終獻

曲同

作解之德形聲一兮爰展獻侑酌則三兮我興有假
云胡有私下土是冒庶其遠而

送神

曲同

陰旄載旋鼓車其鞭問神安歸冥然而天皇有正命
祀事孔燭其臨其歸億萬斯年

雍熙享先農六首

餘同

降神靜安

先農播種九穀務滋靈壇致享良耜陳儀吉日惟亥
運屬純熙樂之作矣神其格思

奠玉幣敷安

親耕展祀明靈來格九有駿奔百司庶職獻奠肅肅
登降翼翼祈彼豐穰福流萬國

奉俎豐安

肅陳韶舞祇薦犧牲乃逆黃俎以率躬耕

亞獻正安

祀惟古典食乃民天歆茲潔祀以應祈年

終獻正安

式陳芳薦爰致虔誠神其降鑒永福黎甿

送神靜安

明禋紺壇靈風肅然登歌已闕神馭將旋道光帝籍
禮備公田鑒茲躬稼末錫豐年

明道親享先農十首

迎神靜安

稼政之本民食惟天甫田兆歲后稷其先靈壇既祀
黛帑攸虔乃聖能享億萬斯年

皇帝升降隆安

冕服在御壇壝有儀陟降左右天惟顯思

奠玉幣嘉安

將躬黛帑先飭靈壇嘉玉量幣舉禮殫神既止止
福亦和安千斯積詠萬國多歡

奉俎豐安

將迎景福乃薦嘉牲藉於千畝用此精誠
皇帝初獻嘉安

雲疊已實玉甯有丹薦於靈籍佇乃神休

飲福禱安

神既至享福亦來酬申錫純嘏旨酒維柔思文后稷
貽我來牟子孫千億丕荷天休

退文舞進武舞正安

羽葆有奕文武交相周旋合度福祿無疆

亞獻正安

豆籩雖薦黍稷非馨惠我豐歲飲茲至誠

終獻正安

飲我嘉薦錫我蕃禧多黍多稌如京如坻

送神靜安

獻終豆徹禮備樂成祠容肅肅風馭冥冥三時務本
一發躬耕人祇胥悅祉福是膺

景祐享先農五首

迎神凝安

在昔神農首茲播殖無有污萊盡為稼穡乃粒斯民
實惟帝力嘉薦令芳佇瞻來格

升降同安

居德之厚厥祀攸陳土膏初脈農事先春鏗然金奏
儼若華紳防降於阼福祿惟神

奠幣明安

農為政本食乃民天茲芬明祀薦養良田陳茲量幣
望彼豐年茂介福祉來欽吉錫

酌獻成安

農祥晨正平秩東作倬彼大田疇乃錢鏹酒醴盈尊
金匏合樂期茲萬年充於六幕

送神凝安

務穡之本恤祀惟馨神斯至止降福攸寧崇茲稼政
合於禮經俎徹樂闋邇仰迴靈

先蠶六首

迎神明安

生民之朔衣皮而羣惟聖有作被冒以文禮樂以成
貴賤以分欲報之德金石諧均

升降翊安

掩抑笙簫鏗鎔金石神來燕娛嘉我休德奉祀之臣
洗心翊翊錫茲福禧以惠四國

奠幣娛安

皇天降物屢化若神聖實先識躬以教民功被天下
為萬世文幣以達志庶幾微聞

酌獻美安

復哉聖神成功微妙迺適哀迺裳以供郊廟百末旨酒
嘉觴自怡靈徠燕養不嘖以笑

亞終獻惠安

神之徠駕踰踰紫壇熙燭夜光會竿瑟鳴球琅薦旨
酒維蘭芳佑明德錫百祥

送神祥安

神之功兮四海所宗占五帝兮莫與比崇修往來兮
旌旗容容恭明祀兮萬世無窮

紹興享先農十一首

皇帝入內壇盥洗降安

大事在祀齊潔為先既盥而升奉以周旋下觀而化
無敢不蠲維神降格鑒厥精虔

迎神靜安

荷與田祖粒食之宗世世仰德青壇載崇時惟后稷

躬稼同功作配並祀以詔無窮

神農后稷位奠幣嘉安

制為量幣厚意是將求之以類各因其方于以奠之
精誠允彰神其享止惠我無疆

尚書奉俎豐安

柔毛剛鬣或剝或烹為俎孔碩登薦厥誠

酌獻福安

蠲滌醴畢巾帨而升挹彼注茲酒醴維清洋洋在上
享於克誠神其孚佑以厚民生

文舞退武舞進正安

羽毛干戚張弛則殊進旅退旅匪棘匪舒

亞獻正安

顯相祀事濟濟鏘鏘舉爵酌醴神其允臧

終獻正安

敬核維旅酒醴維馨於再於三禮則有成

飲福禱安

幽明位異施報理同克恭明神降福乃豐我膺受之
來燕來崇豈伊專享於彼三農

徹豆欽安

莫重於祭非禮不成籩豆有踐爾徹既馨神具醉止
薦以齊明贊徹孔時釐事斯成

送神靜安

神之來止風駛雲翔神之旋歸有迎有將歌以送之
聲榮鏘鏘何以惠民豐年穰穰

親耕籍田七首

皇帝出大次乾安

勤勞稼穡必躬必親為籍千畝以教導民帝出乎震

時惟上春天顏咫尺望之如雲

親耕

元辰既擇禮備樂成洪縻在手祇飾專精三推一發
端冕朱紘靡辭染屨以示黎甿

升壇

方壇屹立陞級而登玉色下照臨觀耦耕萬目咸覩
如日之升成規成矩百福是膺

公卿耕籍

羣公顯相奉事齊莊率時農夫舉耜載揚播厥百穀
以佑我皇多黍多稌不應農祥

羣官耕籍

晏晏良耜我田既臧土膏其動春日載陽執事有恪
於此中邦農夫之慶棲畝餘糧

降壇

肇新帝籍率我農夫三推終畝祇事成均防降孔時
粲然有文受天之祐多稼如雲

歸大次

教民稼穡不令而行進退有度琚瑀鏘鳴言還煩幄
禮則告成帝命率育明德惟馨

紹興祀先農攝事七首

迎神擬安

青陽開動土膏脈起日練吉亥爲農祈祀典秩增峻
儀物具美曄光煥黃庶幾戾止

初獻升殿同安

率職咸蒞禮容粹然澡身端意陟降靡愆神心嘉虞
享茲潔蠲敷錫純佑屢登豐年

奠幣明安

靈旂載臨見光陳賁有嚴篋實式將純意盼靈既接
禮行有次神兮安畱歆我禋祀

神農位酌獻成安

耒耜之教帝實開先致養垂利古今民天嘉薦報本
於以祈年誠格和應神娛福延

后稷位酌獻成安

有周應曆實起后稷相時神功率由稼穡振古稱祀
先農並食阜我昌我時萬時億

亞終獻同安

旨具百味酌備三嘏貳觴既畢禮洽意周庶幾嘉享
格神之幽相我稽事錫以有秋

送神凝安

熙事成兮始終潔齊蓮豆徹兮擗節靡垂靈有嘉兮
降福孔皆飄然逝兮我心孔懷

祀先蠶六首

迎神明安

功被寰宇蠶蟲之靈有神司之以生以成典禮有初
祀事講明孔蓋翠旌降集於庭

初獻盥洗升殿翊安

靈脩戾止詔以毛血既盥而悅尊爵蠲潔金石諧宛
登降有節宜願宜享情文不越

奠幣娛安

化日初長時當暮春蠶事方興惟后惟嬪絲纈御冬
殘生濟人敢忘報本篚幣是陳

酌獻美安

盛服承祀出自公桑衣不羽皮利及萬方百味旨酒
有饌其香神其歆止洋洋在旁

亞終獻惠安

日吉辰良禮備樂作精誠內孚俎豆交錯升歌清越
侑此三爵黎民不寒幽顯同樂

送神祥安

神之來矣靈風肅然云胡不畱歸旒有翩乃舉舊典
歲以告虔降福我邦於萬斯年

景德蜡祭百神三首

降神高安

百物蕃阜四方順成通其八蜡合乃嘉平旨酒斯醇
大庖孔盈萬靈來格威儀以成

奠玉幣酌獻嘉安

肅肅靈壇昭昭上天潔粢豐盛以享以虔百神咸萃
六樂斯縣介茲景福期於百年

送神高安

來顧來享禮成樂備靈馭翩翩雲行雨施
熙寧蜡祭十三首

東西郊降神熙安

天錫康年四方順成乃通蜡祭索享於明金石四作
羽旄翠旌神來燕娛澤被羣生

升降肅安

惟蜡有祭報神之功合聚萬物來享來宗承詔攝事
不忘肅雍靈之格思福祿來崇

奠幣欽安

穰穰豐年繁俟休德帥承天和欽象古則嘉玉量幣
奠容翼翼靈施暨民罔有終極

奉俎承安

禮崇明祀必先成民奉牲以告備膋其均炮炙芬芬

組豆莘莘錫之純嘏以佑斯人

酌獻懌安

秩秩禮文爲壇四方嘉粟旨酒百神迪嘗敷與萬物既阜既昌伊樂厥福傳世無疆

亞終獻慶安

禮文備矣肅肅無譁金石諧節圭璧光華柔以告豐禮以告嘉錫茲福祉以澤幽遐

送神宣安

靈之來下擴景乘光靈之迴御景龍以驥鑒我休德降嘏產祥大田多稼以惠無疆

南北方迎神簡安

美若休德民和歲豐稼穡雲施其積如墉惠我四國先嗇之功祭之百種來享來宗

升降穆安

皇皇靈德經緯萬方承詔攝事陟降以莊高冠岌岌長佩鎔洋嘉承神貺令聞不忘

奠幣吉安

於穆明祀莫如報功靈之利澤惠我無窮齋以滌志幣以達衷撫寧四極未錫登豐

酌獻視安

英英禮文既備而全嚴嚴四郊屹屹紫壇百未旨酒其馨若蘭何以畀民既壽而安

亞終獻曼安

林林生民含哺而嬉教之稼穡實神之爲圖報厚德萬祀無期以假以享錫我繁禧

送神成安

嘉薦芳美靈來宴娛旂車結雲若風馬馳既至而喜

錫我蕃禧嘉承天貺曼壽無期

大觀蜡祭二首

東郊亞終獻慶安

震乘春陽仁司生殖錫我歲豐襄我民力誰其尸之宗子先嗇億萬斯年懷神罔極

南郊升降穆安

穆如薰風敷舒文藻氣蒸消除豐亨黍稷神之聽之鐘鼓咸考於萬斯年惟皇之報

紹興以後蜡祭四十二首

東方百神降神熙安園鐘爲宮

元冥凌厲歲聿其周天地閉藏農且息休古爲蜡禮伊期肇脩爰薦饗馨以迓飗旂

黃鐘爲角

惟大明尊實首三辰功赫庶物光被廣輪歲方索享咸秩羣神靈旂來下尸此明禋

太簇爲徵

三時不害四方順成酬功報始以我齋明闡頌土鼓樂此嘉平降祥幅員惠於函生

姑洗爲羽

日昱乎晝容光必照盼靈之交惟人所召有監在下視茲升燎肅若其承雲駢星曜

初獻升降肅安

禮儀告具必儼容莊工歌屢奏聲和義章崇壇陟降濟濟踰踰靈光共仰嘉薦芬芳

大明位奠玉幣欽安

晨曦未融天宇澄穆有虔秉誠將以幣玉如在左右罔不祇肅神兮安甯錫以祉福

帝神農氏位奠幣曲同

農爲政本食乃民天神農氏作民始力田先嗇之配禮報則然有幣將之維以告虔

后稷氏位奠幣曲同

播種之功時惟后稷推以配天莫匪爾極崇侑清祀是爲司嗇陳幣奠將未祚王國

奉俎承安

享以精禋馨非稷黍工祝致告孔碩爲俎執事駿奔繩繩具舉神之嘉虞介福是與

大明位酌獻懌安

肇禋備祀教民美報時和歲豐奉禮以告惟照臨功等於載燾酌獻云初明神所勞

神農位酌獻曲同

惟酒欣欣惟神冥冥是顧是享來燕來寧未耜之利神所肇興萬世永賴無斁其承

后稷位酌獻曲同

釋之蒸之爲酒爲醴推本所由於焉洽醴周邦開基邵家是啓獻茲嘉觴拜下首稽

亞終獻慶安

申以貳觴百味且旨禮告三終神具醉止旌容騎沓揚光紛委降福穰穰被大豐美

送神宣安

禮樂既成神保聿歸言歸何所地紀天維豈惟屢豐嗣歲所祈億萬斯年神來燕娛

西方百神降神熙安園鐘爲宮

元冬肇祀始於伊者歲事聿成庸答蕃釐眷言西顧匪神司之歸功爾神嗣其下來

黃鐘爲角

魄生自西照望太陽下暨諸神貺施萬方節適風雨
富我國箱恭承嘉祀惟以迪嘗

太簇爲徵

神罔小大奠方茲土祭列坊墉禮追猫虎有功斯民
祀乃其所非稷馨香厥福周溥

姑洗爲羽

豐年穰穰美芳職職籩豆方圓其儀孔碩風馬在御
雲車載飭來顧來享維娛休德

初獻升降肅安

盥獻恭莊燦燦分醑載陟載降禮容可度欽惟爾神
上下肅肅成我稷黍鑒此牲玉

夜明位奠玉幣欽安

穆穆太陰禮嚴姊事璧玉華光推以哀對十二周天
歲乃有終盡我備物莫報元功

神農位奠幣曲同

耒耜肇興自神農氏稼穡滋殖爲農者始作配明祀
奠以告虔萬世佃漁帝功卓然

后稷位奠安曲同

明明周祖惟民之恤播種爲政下民迺粒曾是索糈
而匪先公萬物難報阡陌之功

奉俎承安

時和歲登物亡疾癘實俎間膏報神之福匪神福之
曷成且豐肥腍咸有惟神之功

夜明位酌獻擇安

除壇西郊坎其擊鼓百靈至止結璫作主秬鬯湛淡
玉斝餘醪是謂嘉德神其安留

神農位酌獻曲同

蕩蕩鴻明稱秩羣祀配以昔帝式重農事潔我圭瓚
黃流在中靈其鑒茲盼豐融

后稷位酌獻曲同

歲十二月祀有常典登列司嗇言反其本酌彼泰尊
白未蘭生承神嘉虞繁此德馨

亞終獻慶安

歌磬臚騶管蕭激香颺御奄留申以貳觴相與震潏
告靈其醉庶幾聽之成我熙事

送神宣安

禮備樂成澹然將歸其雷消搖象輿已轡偃蹇欲驤
羽毛紛委忽乘杳冥遺此福祉

南方百神迎神簡安

維物之精散乎太空維索之饗合聚而同迺擊土鼓
於歲之終格彼幽矣盼饗其通

初獻盥洗升降穆安

有悅其新有匪其潔言念清祀弗簡弗褻誠意既交
品物斯列是用告虔靡神不悅

奠幣吉安

百室機杼衣褐具宜民以卒歲神實惠之言舉祀典
答神之釐有匪斯陳振古如茲

神農位酌獻穆安

肇降生民有不粒食維時神農過爲先嗇爾耒耜
云誰之因酌以污尊我思古人

后稷位酌獻穆安

維后之功配天其大祀而稷之萬世如在黃冠野服
駿奔皇皇自古有年神其降康

亞終獻曼安

豐年孔多百禮以洽匪極神歡何以昭答載酌之酒
用申其勤神具醉止與物交欣

送神成安

卒爵樂闋禮儀告備神保聿歸敢以辭致順成之方
其蜡乃通自今以始八方攸同

北方百神迎神簡安

蕩蕩闔決氣清沉寥彷彿象與麗於穹霄蹇其來下
肅然風飄神平安留於焉消搖

初獻盥洗升降穆安

齊誠揭虔敬恭祀事維儼之容維潔之器雍雍樂成
肅肅禮備神其燕娛錫祉庶類

奠幣吉安曲同

神宅於幽呦呦沈沈至和塞明考我德音神聽靜嘉
儼乎若臨幣以薦誠敢有弗欽

神農氏位酌獻穆安

先嗇之功神實稱首以耜以耒俶載南畝列籍皇墳
億世是守何以爲報爰潔茲酒

后稷氏位酌獻穆安

煌煌后稷實配於天司穡作稼民以有年匪神之私
歲以醴告酌彼泰尊於德之報

亞終獻曼安

蘭生百末申以貳觴神具醉止爛其容光遺我豐年
萬億及秭俾民驩康以洽百禮

送神成安

靈之來兮蚪龍沓沓下土光景憑陵闔闔靈之旋兮
羽衛委蛇偃蹇高驤遺此蕃釐

景祐祭文宣王廟六首

迎神擬安

大哉至聖文教之宗紀綱王化不變民風常祀有秩
備物有容神其格思是仰是崇

初獻升降同安

右文興化憲古師今明祀有典吉日惟丁豐犧在俎
雅奏來庭周旋陟降福祉是膺

奠幣明安

一王垂法千古作程有儀可仰無德而名齊以滌志
幣以達誠禮容合度黍稷非馨

酌獻成安

自天生聖垂範百王恪恭明祀陟降上庠酌彼醇旨
薦此令芳三獻成禮率由舊章

飲福綏安

犧象在前豆籩在列以享以薦既芬既潔禮成樂備
人和神悅祭則受福率遵無越

兗國公配位酌獻成安

哲宗朝增此一曲

無疆之祀配侑可宗事舉以類與享其從嘉栗旨酒
登薦惟恭降此遐福令儀肅雍

送神擬安

肅肅庠序祀事惟明大哉宣父將聖多能歆馨盼饗
廻馭凌兢祭容斯畢百福是膺

大觀三年釋奠六首

迎神擬安

仰之彌高鑽之彌堅於昭斯文被千萬年峩峩膠庠
神其來止思報無窮敢忘於始

升降同安

生民以來道莫與京溫長恭儉惟神惟明我潔尊疊
陳茲芹藻言升言旋式崇斯教

奠幣明安

於論鼓鐘於茲西雍柔盛肥碩有顯其容其容洋洋
威瞻像設幣以達誠歆我明潔

酌獻成安

道德淵源斯文之宗功名糠粃素王之風碩兮斯牲
芬兮斯酒綏我無疆與天爲久

配位酌獻成安

儼然冠纓崇然朝廷百王承祀涓辰惟丁於牲於醑
其從予享與聖爲徒其德不爽

送神擬安

肅莊紳綬吉蠲牲犧於皇明祀薦登惟時神之來兮
盼饗之隨神之去兮休嘉之貽

大晟府擬撰釋奠十四首

迎神擬安黃鐘爲宮

大哉宣聖道德尊崇維持王化斯民是宗典祀有常
精純竝隆神其來格於昭盛容

大呂爲角

生而知之有教無私成均之祀威儀孔時維茲初丁
潔我盛柔未適其道萬世之師

太簇爲徵

巍巍堂堂其道如天清明之象應物而然時維上丁
備物薦誠維新禮典樂諧中聲

應鐘爲羽

聖王生知闡迺儒規詩書文教萬世昭垂良日維丁
靈承不爽揭此精虔神其來享

初獻盥洗同安

右文興化憲古師今明祀有典吉日惟丁豐犧在俎
雅奏在庭周旋陟降福祉是膺

升殿同安

誕興斯文經天緯地功加於民實千萬世笙鏞和鳴
柔盛豐備肅肅降登歆茲秩祀

奠幣明安

自生民來誰底其盛惟王神明度越前聖柔幣具成
禮容斯稱黍稷非馨惟神之聽

奉俎豐安

道同乎天人倫之至有饗無窮其與萬世既潔斯牲
衆明醑旨不懈以忱神之來暨

文宣王位酌獻成安

大哉聖王實天生德作樂以崇時祀無斁清醑惟馨
嘉牲孔碩薦羞神明庶幾昭格

兗國公位酌獻成安

庶幾屢空淵源深矣亞聖宣猷百世宜祀吉蠲斯辰
昭陳尊簋旨酒欣欣神其來止

鄒國公位酌獻成安

道之由興於皇宣聖惟公之傳人知趨正與享在堂
情文實稱萬年承休假哉天命

亞終獻用文安

百王宗師生民物軌瞻之洋洋神其寧止酌彼金罍
惟清且旨登獻惟三於噫成禮

徹豆娛安

犧象在前豆籩在列以饗以薦既芬既潔禮成樂備
人和神悅祭則受福率遵無越

送神凝安

有嚴學宮四方來宗恪恭祀事威儀雍雍歆茲惟馨
颺馭旋復明禋斯畢咸膺百福

景祐釋奠武成王六首

迎神凝安

維師尚父賜履分封靈神峻密祀事寅恭蕭肅祇薦
颺馭排空如幾如式福祿來崇

太尉升降同安

上公攝事哀服斯皇禮容濟濟佩響鏘鏘靈旂恍惚
嘉薦令芳神具醉止降福穰穰

奠幣明安

四嶽之裔涼彼武王發揚蹈厲周室用昌追封廟食
簡冊增芳升幣以奠磬筦鏘鏘

酌獻成安

微渭之陽理冥嘉應非龍非虎聿求元聖平易近民
五月報政祀典之崇於斯爲盛

飲福綏安

神機經武隆周之寓表海分封邁燕超魯耽耽廟貌
俎豆有序薦福邦家維師尚父

送神迎安

聖朝稽古崇茲武經禮交樂舉於神之庭嘉栗旨酒
既饗芳馨永嚴列象劒鳥簪纓

熙寧祀武成王一首

初獻升降同安

武德洗洗日靖四方百王所祀休有烈光命官攝事
佩王鏘鏘思皇多祐以惠無疆

大觀祀武成王一首

酌獻成安

涼彼周王君臣相遇終謀其成諸侯來許洋洋神靈
尊載酒醕新聲爲侑笙簫備舉

紹興釋奠武成王七首

迎神凝安姑洗爲宮

於赫烈武光昭古今載嚴祀事救備惟欽既潔其牲
既諸其音神之格思來顧來歆

初獻升殿同安

肅肅廟中有嚴階城匪棘匪徐進退可則冕服是儀
環珮有節神之鑒觀率履不越

奠幣明安

祀率舊典禮崇駿功齊明裏正盼饗豐融量幣肅備
周旋鞠躬神其昭受幽贊無窮

正位的獻成安

赫赫尚父時維鷹揚神潛韜略襟抱帝王談笑致主
竹帛流芳國有嚴祀載稽典常

留侯位的獻

眷彼留侯奇籌贊漢依乘風雲勒成功且克配明禋
儀刑有煥英氣如生來格來衍

亞終獻正安

道助文德言爲世師功名不泯祀事無遺旨酒惟馨
具醉在茲有嘉累獻神其燕娛

送神

日惟上戊神顧精純禮備三獻樂成七均奄畱洋洋
流福無垠言還恍惚空想如存

紹興祀祚德廟八首

迎神凝安姑洗爲宮

匿孤立後惟義惟忠昔者神考追錄乃功祀典載加
進爵錫公神兮降格尚鑒褒崇

初獻升降同安

廟宇更新輪奐豐敞神靈如在英姿颯爽執事進趨
降升俯仰威儀翼翼虔虔祈歆饗

奠幣明安

牲薦碩大幣致精純聿升祀事茲用兼陳箱篚既賁
奠獻惟寅饗我至意福祿來成

疆濟公位的獻成安

以身託孤實惟死友撫嫗長之若父若母潛授於韓
克興厥後崇廟以獻德後報厚

英略公位的獻成安

立孤固難死亦匪易義輕一身開先趙嗣肅穆廟貌
烈有餘氣式旋嘉薦昭哉祀事

啓佑公位的獻成安

於皇時宋永祚有基始繁覆護扶而立之敢忘昭答
牲分酒醑靈其燕饗益相本支

亞終獻用正安

幽幽靈宇神安且翔三哲鼎峙中薦嘉觴凜若義氣
千載彌光荷其祐之錫羨無疆

送神凝安

禮樂云備畢觴爾神翊翊音送轅輿若聞駕言歸兮
靈旂結雲祚我千億介福來臻

司中司命五首

迎神欣安

冠裳我兮服章粲粲靈來下兮進止委蛇我涓我壇
我潔我俎降輿御旌於茲享御

升降欽安

紳綏舒舒佩環鏗鏘陟降上下壇燎光明有盥於鼎
有悅於巾不吳不敖庶以安神

奠幣容安

我誠既潔我豆既豐神來降期有儼其容薦此嘉幣
肅肅雍雍何以侑之於樂鼓鐘

酌獻雍安

酌茲旨酒既盈且芬式用來歆衍衍熏熏何以寧神
薦有嘉遘何以錫民曰惟豐年

送神欣安

雲兮飄飄風兮稜稜颿颿反空杲日來昇歸旆揚揚
衆樂銷鏘我神式惟惠我嘉祥

五龍六首

迎神禧安

神之智兮躍漢潛幽欲參擾兮無董與劉陳金石兮
佐侑半羞庶燕享兮澤應民求

升降雅安

靈之至兮逸駕騰驤嘯雲吸氣承祀日光展詩鳴律
肅莊琳琅何以膺神貺惠無疆

奠幣文安

維靈德兮變化不常沛天澤兮周流八荒奠嘉幣兮
肅雍不忘末佑民兮錫以豐穰

酌獻愷安

練吉日兮進神之堂牲既陳兮粢盛既香尊桂酒兮
容與嘉觴靈安留兮錫我福祥

亞終獻嘉安

明明天子禮文咸秩矧神之功橫被九域雲施稱民

物產滋殖嘉承惠和罔有終極

送神登安

靈之來下以雨先驅靈之旋馭五雲結車操環應夏
發匣端虞真人在御來獻珍符

建隆乾德朝會樂章二十八首

皇帝升坐隆安

天臨有赫上法乾元鏗鏘六樂儼恪千官皇儀允肅
五坐居尊文明在御禮備誠存

公卿入門正安

堯天協紀舜日揚光淑慎爾止率由舊章佩環濟濟
金石銷鏘威儀炳煥至德昭彰

上壽禧安

乾健爲君坤柔爲臣惟其臣子克奉君親永御皇極
以綏兆民稱觴獻壽山岳嶙峋

舜韶更奏堯酒浮觴皇情載懌洪算無疆基隆郊廓
德茂陶唐山魏日煥地久天長

皇帝舉酒第一盞用白龜

聖德昭宣神龜出焉載白其色或游於川名符在沼
瑞應巢蓮登歌丹陛紀異靈篇

第二盞甘露

天德冥應仁澤載濡其甘如醴其凝如珠雲表潛結
顯英允敷降於竹柏未昭瑞圖

第三盞紫芝

煌煌茂英不根而生蒲茸奪色銅池著名晨敷表異
三秀分榮書於瑞典光我文明

第四盞嘉禾

嘉彼合穎致貢升平異標南畝瑞應西成德至於地

皇祇效靈和同之象煥發祥經

第五盞玉兔

盛德好生網開三面明視標奇昌辰乃見育質雪園
淪精月殿著於樂章色含江練

羣臣舉酒正安

戶牖嚴丹戾鵲鸞造紫庭懇祈南岳壽勢拱北辰星
得士於茲盛基邦固以寧誠明一何至金石與丹青

又

簪紱若雲屯晨趨闔闔門僉僉羅禹會濟濟奉堯樽
周禮觀明備天儀仰睟溫高卑陳表著同拱帝王尊

又

待漏造王庭威儀盛莫京紛綸簪組列清越珮環聲
禮飲終三爵韶音畢九成求固鳧藻樂千載奉升平

羣臣第一盞畢作元德升聞

治定資神武功成顯膺文貢輪庭實旅朝會羽儀分
偃革千年運垂裳萬乘君執知堯舜力明德自升聞

又

約法皇綱正崇文寶曆昌道人振木鐸農器鑄千將
瑞日含王宇卿雲霽帝鄉萬邦成一統鴻祚與天長

六變

宸展威容盛聲明禮樂宣九州臻禹會萬國戴堯天
貢職輸琛寶皇飲煥簡編合和均暢茂鴻慶結非烟

又

朝會儼威儀司常建九旗舞容分綴兆文物辨歲穡
運格桃林牧祥開洛水龜帝功潛日用化俗自登熙

又

螭階聊載筆紀瑞軼唐虞丹鳳儀金奏黃龍負寶圖

羣材薪棧樸仁政煦蒲盧蕩蕩魏魏德脉魚信自孚

又
接聖宅神都方來五達區國賢熙帝載靈命握乾符
至化當純被斯文益誕敷車書今混一聖治奉三無

又
聖王臨大寶八表湊才賢經緯文天賦剛柔德日宣
建邦隆柱石造物運陶甄共致昇平業綿長保億年

又
神化妙無方巍巍邁百王鶴書搜隱逸龍陞管賢良
拱揖朝羣后賓筵闊四方洪圖基億載淳耀德彌光

第二盞畢天下大定
皇猷敷八表武諒肅三邊蘭綺韜兵日靈臺偃伯年
奏珍皆述職削社盡朝天功德超前古音徽播管絃

又
伐叛天威震恢疆帝業多削平倖肅殺涵煦極陽和
蹈厲觀周舞風雲入漢歌功成推大定歸馬偃琕戈

六變
惕厲日乾乾潛蟠或躍淵伐謀參上策受鉞總中堅
田訟歸周日民謠戴舜年風雲自冥感嘉會翼飛天

又
壺關方逆命投袂起親征虎旅聊攻伐梟巢遽蕩平
天威清朔漠仁澤被黎氓按節皇輿復洋洋載頌聲

又
蠢茲淮海帥保據毒黎苗不悟龍興漢猶同大吹堯
六師方雨施孤壘自冰消千載逢嘉運華華奉聖朝

又
上游荆楚要澤國洞庭深自識同文世世皆迴拱極心

一戎聊仗鉞九土盡輸金大定功成後薰風入舜琴

又
席卷定巴邛西遐盡率從岷峨難負阻江漢自朝宗
述職方舟集驅車九折通粵然書國史冠古耀豐功

又
銳旅慶回旋邊防盡晏然觀橐方偃武飛將亦韜弦
震耀資平壘文明協麗天洸洸成大業赫奕在青編

淳化中朝會二十三首
上壽和安
四序伊始三陽肇開條風入律玉管飛灰望雲肅謁
鳴佩斯來稱觴獻壽瞻拱星迴

又
一陽應候萬國同文天正紀節太史書雲凝旒在御
列敘爰分壽觴斯薦祝慶明君

皇帝初舉酒用祥麟
聖皇御寓仁獸誕彰在郊旅貢游時呈祥星辰是稟
草木無傷紀異信史登歌太常

再舉酒丹鳳
九苞薦瑞戴德膺仁藻翰爰奮靈音載振非時不見
有道則珠降岐匪匹儀舜為鄰

三舉酒河清
沔彼涇濱澄明鑑如清應寶運光涵帝居同分沈璧
徹見游魚聖祚無極神休倬與

四舉酒白龜
稽彼靈物允昭聖皇浮石可躍巢蓮益光金方正色
介族殊祥信書末耀帝德無疆

五舉酒瑞麥
芄芄嘉麥擢秀分岐甘露夕灑惠風晨吹良農告瑞

循吏稱奇歸美英主折而貢之

羣臣初舉酒畢作化成天下
軒昊方同德成康粗比肩素風惟普暢皇道本無偏
陰魄重輪滿陽精五色圓要荒咸率服卓越聖功全

又
聖德比陶唐千年祚運昌茂功雖不宰鴻業自無疆
極塞成清謐齊民益阜康文明同日月遐邇仰輝光

六變
蕩蕩無私世巍巍至聖君山河分國寶日月耀人文
厭浥凝甘露輪困吐慶雲正聲兼大雅洋溢應南薰

又
鴻範合彝倫調元四序均歲功天吏正御苑物華新
底貢陳方物來賓列遠人奉常呈九奏嘉貺動穹旻

又
大君隆至化興運契千齡觀禮俄班瑞夷寶盡實庭
成文調露樂奉聖拱辰星舞佾方更進朝陽上楚萍

又
禮樂昭王業震區致太平革車停北狩雲稼屢西成
國有詳延詔鄉閭講讀聲日華融五色遐邇仰文明

又
亭障戢干戈人心浹太和務農登寶穀獵俊設雲羅
儀鳳書良史祥麟載雅歌嘉辰衮宴喜星拱弁義裝

又
冠古耀鴻徽深仁及隱微二南江漢味九奏鳳凰飛
設虞羅鐘律盈庭列舞衣文明資厚德怡懌兆民歸

再舉酒畢咸加海內
革輅征汾晉櫜城比燎毛桓桓助軍旅將將御英豪

神武誠無敵天威詎可逃王師宣利澤濡若沃春膏

又

振萬方明德疾徐咸可觀鏗鏘動金奏蹈厲總朱干
夾進昭威武申嚴警晏安守方推猛士當用鶚爲冠

六變

宣謝始觀兵桓桓稱鼓行一戎期大定載續議徂征
善政從師律神功冀武成勛哉勤誓衆王業自經營

又

聲教方柔遠甌閩禮可招獻圖連日際歸國象江湖
撫運重熙盛提封萬里遙還同有虞氏文德格三苗

又

南暨宣皇化東吳奉乃神舞千方耀德執玉自來賓
巢伯朝丹陛韓侯觀紫宸古今歸一揆懷遠道彌新

又

遺俗續陶唐來蘇後聖皇布昭湯弔伐恢復漢封疆
金鉞申戡剪朱干示發揚宜哉七德頌千載播洋洋

又

乃眷嘗西顧偏師暫首征靈旗方直指擴俗自亡精
禹敘終馴致堯封漸化成不須嚴尉侯於廓海彌清

又

千戚有司傳威容著凱旋象成王業盛役輟武功全
兵寢西郊閱書惟北闕縣聖神膺景命卜世萬斯年

景德中朝會一十四首

皇帝升坐隆安

金奏在庭羣后在位天威煌煌嚮明負辰高拱穆清
弁冕端委盛德日新禮容有煒

公卿入門正安

萬邦來同九賓在位奉璋薦紳陟降庭止文思安安
威儀棣棣臣哉鄰哉分爾蕃祉

上壽和安

天威煌煌山龍采章庭實旅百上公奉觴拱揖羣后
端委垂裳永錫難老萬壽無疆

皇帝初舉酒祥麟

帝圖會昌二獸效祥雙角共觥示武不傷四靈爲畜
元枵耀芒公族信厚元元阜康

再舉酒丹鳳

矯矯長離振羽來儀和音中律藻翰揚輝珍符沓至
品物攸宜至德元感受天之祺

三舉酒河清

德水湯湯發源靈長皎鑒澄徹千年效祥積厚流濕
資生阜昌朝宗潤下善利無疆

羣臣舉酒正安

思皇多士靖恭著位鳴玉飛綏鏘鏘濟濟宴有折俎
以示慈惠罔敢不祇福祿來暨

金奏在庭有酒斯旨顒顒印印嚮明負辰湛湛露斯
式宴以喜佩玉榮兮罔不有禮

酒以成禮樂以侑食露湛朝陽星環紫極淑慎爾容
既飽以德進退周旋威儀抑抑

初舉酒畢盛德升聞

八佾具呈萬舞有奕既以象功又以觀德進旅退旅
執籥秉翟至化懷柔遠人來格

闔闔天開羣后在位設業設簋庭燎晰晰斧戣當陽
虎賁夾陛舞之蹈之四陳來暨

再舉酒畢天下大定

武功既成綴兆有翼以節八音以象七德俱俱踴躍
朱干玉戚發揚蹈厲其儀不忒

偃伯靈臺功成作樂以昭德容以清戎索萬邦會同
邪慝銷鑠盡善盡美佻彼韶箏

降坐隆安

被袞當陽穆穆皇皇擊石拊石頌聲揚揚和樂優洽
終然允臧禮成而退荷天百祥

大中祥符朝會五首

皇帝舉酒醴泉

觴沸檻泉寒流清泚地不愛寶其旨如醴上善至柔
靈休所啓利澤無疆允資岱禮

再舉酒神芝

彼茁者芝茂英煌煌數秀喬嶽實繁其房適符脩貢
封巒允臧末言登薦抑惟舊章

三舉酒慶雲

惟帝佑德卿雲發祥紛紛郁郁五色成章奉日逾麗
回風載翔歌薦郊廟播厥無疆

四舉酒靈鶴

元文中錫嘉祥紹至偉茲胎禽羽族之異翻翰來儀
徘徊嘹唳祚聖儲休聿昭天意

五舉酒瑞木

天生五材木曰曲直維帝順天厚其生植連理效祥
成文表德總萃坤珍永光祕刻

熙寧中朝會六首

皇帝初舉酒慶雲

乾坤順夷皇有嘉德爰施慶雲承日五色輪囷下乘
萬物皆飾惟天祚休長彼無極

再舉酒嘉禾

彼美嘉禾一莖九穗農疇告祥史牒書瑞擊壤歡歌
如京委積畱獻春種昭錫善類

三舉酒靈芝

皇仁溥博品物蕃滋慶祥回復秀發神芝靈華雙舉
連葉四施披圖按牒永享純禧

元符大朝會三首

皇帝初舉酒靈芝

嘉瑞降臨應我皇德煜煜神芝不根而植春秋三秀
晝夜一色物播詩歌聲被金石

再舉酒壽星

倬彼星象於昭於天維南有極離丙之躔既明且大
應聖乘乾誕受景福億萬斯年

三舉酒甘露

泣泣零露雲英醴溢和氣凝津流甘委白飴泛泮林
珠聯竹柏天不愛道聖功允格

哲宗傳受國寶三首與大朝會兼用

永昌

於穆我王繼序不忘明昭上帝上帝是皇長發其祥
惠我無疆受命於天既壽永昌

神光

惟皇上德伊嘏我王將受厥明載錫之光於昭於天
煜煜煌煌緝熙欽止其永無疆

翔鶴

彼鳴在陰亦白其羽聲聞於天來集斯所勉勉我王
咸遂厥宇播於異物受天多祐

紹興朝會十三首

皇帝升坐乾安

鉤陳肅列金奏充庭願印南面如日之昇垂衣拱手
治無能名順履獻歲大安大榮

公卿入門正安

同升

天子當陽臣工率職流水朝宗衆星拱極環佩鏘鏘
威儀抑抑上下交欣同心同德

上公上壽和安

八音克諧萬舞有奕上公奉觴率茲百辟聲效呼嵩
祝聖人壽億載萬年天長地久

皇帝初舉酒瑞木成文

厚地效珍嘉木紀瑞匪刻匪雕具文見意三登太平
允協聖治詩雅咏歌有光既醉

再舉酒滄海澄清

百谷王符聖治不揚波效殊祉德淪滄海清應千
秋敘五行

三舉酒瑞粟呈祥

至治發聞惟馨香播厥百穀臻穰穰農夫之慶咸其
有禾易長畝盈倉箱時和物阜粟滋嘉生駢穗來

呈祥自今以始大豐美行旅不用齋餼糧

羣臣酒行正安

羣公卿士咸造在庭式燕以衍思均露零穆穆明明
於斯為盛歸美報上一人有慶

明明天子萬福來同嘉賓式燕曷不肅雍燕以示慈

式禮莫愆樂胥君子容止可觀

酒一行文舞

帝德誕敷銷燦羣慝近悅遠來惟聖特克玉振金聲
治功興起韶簡象之盡善盡美

文物以紀藻色以明禮備樂舉通觀厥成睿知有臨
誕敷文德教雨化風洽此四國

酒載行武舞

用戒不虞誰能去兵師出以律動必有名折彼遐衝
布昭聖武和衆安民時惟多助

止戈曰武惟聖為能御得其道無敢不庭整我六師
稽諸七德不吳不揚有嚴有翼

皇帝降坐乾安

帝坐熒煌延紳肅穆對揚天休各恭爾服頌聲洋洋
彌文郁郁禮備樂成未膺多福

建隆御樓三首

南郊回仗駕至樓前采茨

高煙升太一明祀達乾坤天仗回曉闕皇輿入應門
簪裳如霧集車騎若雲屯兆庶皆翹首巍巍萬乘尊

升坐隆安

禮祀畢園丘嘉辰慶澤流天儀臨觀魏盛禮藹風猷
洋溢歡聲動氛氲瑞氣浮上穹垂眷佑邦國擁鴻休

降坐隆安

華纓就列左社來王帝儀炳煥大樂鏗鏘禮成曉闕
言旋未央一人有慶萬壽無疆

咸平御樓四首

采茨

禮成於郊迎日之至時乘六龍天旋象魏端門九重
虎賁萬騎四夷來王羣后輯瑞

索扇隆安

應門有翼羽衛斯陳山龍袞冕律度聲身戢戢奉璋
肅肅九賓清明在躬志氣如神

升坐隆安

園丘類上帝六變降天神禋燔禮云畢仗衛肅以陳
天顏瞻咫尺王澤熙陽春玉帛臻禹會動植霑堯仁

降坐隆安

肆眚云畢淳熙溥將雷雨麗澤雲物效祥禮容濟濟
天威皇皇大賚四海富壽無疆

咸平籍田回仗御樓二首

采芡

農皇既祀禮畢躬耕商輅旋軫周頌騰聲觀魏將陟
服御爰更與人瞻仰如日之明

升坐隆安

應門斯御雉扇爰開人瞻日月澤動雲雷同風三代
均禧九垓歡心允洽時詠康哉

乾興御樓二首

升坐隆安

夾鐘紀月初吉在辰膏災流慶有德推仁采章震耀
典禮具陳茂昭丕覲永庇斯民

降坐隆安

皇衢赫敞黼坐穹崇華纓在列嚴令發中王制鉅麗
寶瑞豐融均禧縣寓萬壽無窮

紹興登門肆赦二首

升坐乾安

拜兄於郊皇哉唐哉熙事休成六駢鼎來天闔以決
地垠以開墮祉發祥如登春臺

降坐乾安

鴻霈普洽言歸端門蕩蕩巍巍旋乾轉坤穆然宣室
儲恩垂恩於萬斯年敷錫羣元

寧宗登門肆赦二首

升坐乾安

帝饗於郊荷天之休五福敷錫皇明燭幽雲行雨施
仁翔德游聖人多男歌頌九州

降坐乾安

天日清晏朝野靖安三靈答祉萬國騰懽帝命不違
王業艱難天子萬年永迪監觀

皇帝上尊號一首

冊寶入門正安

於穆元后天臨紫宸飛綏星拱建羽林芬徽冊是奉
鴻名愈新荷茲介祉末末無垠

欽定古今圖書集成經濟彙編樂律典

第二十五卷目錄

樂律總部彙考二十五

宋樂章十六



樂律典第二十五卷

樂律總部彙考二十五

宋樂章十六

明道元年章獻明肅皇太后朝會十五首

皇太后升坐聖安

聖母有子重光類禮聖皇事母感極天人百辟在庭

九儀具陳禮容之盛萬國咸賓

公卿入門禮安

帝率四海承顏盡恭端闈肅設羣后來同玉佩鏘鳴

衣冠有容英韶節步磬管雍雍

皇帝上壽酒崇安

天子之德形于四方尊親立愛化洽風揚聖母禕衣

明君黼裳因時獻壽克盛朝章

上壽福安

盛禮煌煌六衣有光千官在位百福稱觴乾德慈仁

邦斯淑祥如山之壽佑聖無疆

皇太后初舉酒玉芝

煜煜靈芝生于殿闈照映華棋紛敷玉蕤感召元和

光符聖期祥篇協吉百福咸宜

再舉酒壽星

現彼南極昭然瑞文騰光丙位薦壽中宸太史駢奏

升歌有聞軒宮就養億萬斯春

三舉酒奇木連理

王化無外坤珍效靈旁枝內附直幹來并羣分非一

祺祥紹登至誠攸感海縣斯寧

羣臣酒行禮安

肅肅臨下有威有容循循事上惟信惟忠盛禮典樂

示慈訓恭君臣協吉惟道之從

湛湛零露晞于載陽我有旨酒羣臣樂康既飲以德

亦圖爾良末言修輔用協天常

禮均孝慈樂合韶武至德光矣鴻恩亦溥上下和濟

華裔樂消醴醞三行盛儀斯舉

酒一行畢作厚德無疆之舞

堯母之聖放助爲子同心協謀柔遠能邇以德康俗

以文興治斯焉象功罔不昭濟

至矣坤元道符惟聖就養宸極助隆善政翟籥紛舉

笙鏞協應翺翔有容表德之盛

酒再行四海會同之舞

七德之舞四朝用康有如姬妣助集周邦威克厥愛

居安不忘風旋山立濟濟皇皇

左秉朱干右揮玉戚以象武綴以明皇德天子榮養

羣臣述職四夷賓附罔不承式

降坐聖安

長樂居尊盛容有煒文王事親萬國歸美朝會之則

邦家之紀受福于天克昭隆禮

治平皇太后皇后冊寶三首

皇帝升坐乾安

王化之始治由內乎時庸作命玉簡金書啓筦在庭

其縱釋如天臨法展禮與誠俱

太尉等奉冊寶入門正安

辟儀臨拱丕命明敷驚回寶勢鴻貫瑤光禮成樂備

德裕名芳肇基王化永懋天祥

皇帝降坐乾安

袞衣繡裳嚴威肅莊八音具張簨簾龍驤玉簡瑤章

金書煌煌壽千萬年與天比長

熙寧皇太后冊寶三首

出入正安

煌煌鳳字玉氣宛延天門嘯吻飛駢後先龍簨四合

奏鼓淵淵母儀天下何千萬年

升坐乾安

裴裴繡展旋佩以登如彼杲日凌天而升玉色下照

璽臺繩繩猗歟大孝四海其承

降坐乾安

皇帝降席流雲四開堯趨舜步下躡天塔恭授寶冊

翠毛裝回明明純孝鴻釐大來

哲宗上太皇太后冊寶五首

皇帝升坐乾安

大矣孝熙帥民以躬奉承寶冊欽明兩宮萬樂具舉

一人肅雍化由上始四海來同

降坐乾安

皇帝仁孝總臨萬方褒顯其親日嚴以壯龍哀翼翼

玉書煌煌傳之億世休有烈光

太皇太后升坐乾安

總裁庶政擁佑嗣皇金書玉簡爛其文章衆歌贊作
莞馨將將保安四極降福無疆

降坐乾安

塗山之德涓埃之祥圖徽寶冊玉色金相管弦煒煒
鐘鼓皇皇天之所啓既壽而昌

太尉等奉冊寶出入門正安

玉車臨御鳳蓋羣麗奉承冊寶彌文盛儀抗聲極律
助我孝熙天之所佑萬壽無期

紹興十一年發皇太后冊寶八首

皇帝隨冊寶降殿聖安

景祚有開符天媲美誕毓聖神是崇位號星拱天隨
祇嚴冊寶還御慈寧增光舜道

中書令奉冊詣皇帝褥位禮安

聲樂備陳禮容罔忒相維辟公虔奉玉冊皇則受之
慕形于色既壽且康與天無極

侍中奉寶詣皇帝褥位禮安

祖啓搖光誕生明聖尊極母儀帝康作命寶章煌煌
導以笙磬還燕慈寧邦家後慶

太傅奉冊寶出門聖安

肅肅東朝帝隆孝治猗歟丕稱寶冊斯備皇扉四闢
導迎慶瑞德邁太任有周卜世

太傅奉冊寶入門聖安

靜順坤儀聖神是有懿鑠昭陳鏤文華玉樂奏既備
禮儀不瀆導迎善祥翟車歸翹

太傅奉冊授提點官禮安

孝奉天儀信維休德發越徽音禮文靡忒永保嘉祥

時萬時億歸于東朝含飴燕息

太傅奉冊授提點官禮安

肅雍長樂克篤其慶河洲茂德沙麓啓聖是生膺哲
蚤隆丕運欽稱鴻寶未膺天命

冊寶升慈寧殿幄聖安

禮行東朝樂奏大呂羽衛森陳簪紳式序雲幄遂嚴
宏典是舉天子萬年母儀寶宇

乾道七年恭上太上皇帝太上皇后尊號十一

首

冊寶降殿正安

元祀介福孰綏孰將歸于尊親孝哉君王載鏤斯牒
載琢斯章得名得壽如虞如唐

中書令侍中奉冊寶詣殿下正安

宗郊斯成交舉典冊汝輔汝弼威儀是力陳於廣庭
迨此上日巍巍煌煌烏覩在昔

皇帝奉太上皇帝冊寶授太傅用禮安

奉太上皇后同

儀物陳矣禮樂明矣天子戾止詔爾臣矣防降維則
恭且勤矣茫茫四海德教形矣

冊寶出門正安

天門九重蕩蕩開徹金支秀華垂紳佩玦或導或陪
率履不越注民耳目四表胥悅

冊寶入德壽宮門正安

禮神頌祇福祿來下不有榮名執緝伊嘏千乘萬騎
魚魚雅雅皇扉洞開鞠躬如也

太上皇帝升御坐

降

穆穆聖顏安安天步有綳者儀以莫不舉天人和同
恩澤洋洋億載萬年爲衆父父

太傅奉太上皇帝冊寶升殿用聖安

大哉堯乎南嚮垂裳君哉舜也拜而奉觴繼藉光華
鼓鐘鏗鏘三事稽首宋德無疆

太傅奉太上皇后冊寶升殿用聖安

乾元資始坤元資生允也聖德同實異名春王三朝
典冊竝行咨爾上公相儀以登

皇帝從太上皇后冊寶詣宮中用正安

維冊伊何鑣玉垂鴻維寶伊何範金鈕龍翊以贊御
間以笙鏞誰敢不恭天子實從

太上皇后出閣升御坐坤安

降

帝膺未福功靡專有既尊聖父亦燕壽母怡怡在宮
大典時受彤管紀之天長地久

內侍官舉太上皇后冊詣讀冊位用聖安

敘福于郊逢時之泰揭名日月伴德覆載自我作古
域中有大末言保之眉壽無害

淳熙二年發太上皇帝太上皇后冊寶十一首

冊寶降殿正安

高明者乾博厚者坤以清以寧資始資生壽胡可度
德胡可評願言從欲誕受鴻名

中書令侍中奉冊寶詣殿下正安

受命既長福祿既康如日之升如月之常追琢其章
金玉其相天子萬年保其家邦

皇帝奉太上皇帝冊寶授太傅禮安

奉太上皇后同

翠華之旗靈鼉之鼓陳于廣宇相我盛舉來汝公傳
肅乃儀矩毋愆于素以篤多祐

冊寶出門正安

螭蟠青龍婉嬪象與其載伊何煌煌金書乃由端門

乃行康衢于以榮親振古所無

冊寶入德壽宮門正安

惟天爲大其德曰誠惟堯則之其性曰仁迺文迺武得壽得名於萬斯年以莫不增

太上皇帝升御坐乾安

天行惟健天步惟安聖子中立臣工四環民無能名威不違顏宋德宜頌漢儀可刪

太傅奉太上皇帝冊升殿聖安

天畀遐福允彰父慈維昔曠典我能舉之徐爾陟降敬爾威儀申錫無疆末言保之

太傅奉太上皇后冊寶升殿聖安

乾坤從陽剛陰相迨茲受祉允也並況虞業在下儀物在上咨時三公執事無曠

皇帝從太上皇后冊寶詣宮中用正安

丕顯文王之德之純亦有太妃式揚徽音維冊維寶迺玉迺金伊誰從之一人事親

太上皇后出閣升御坐坤安

重翟出房褱衣被躬委委佗佗河潤山容聖皇臨軒聖母在官並受鴻名與天無窮

內侍官舉太上皇后冊詣讀冊位用聖安

珉玉玼闕衷蹄精良既刻厥文亦鑄之章象德維何至靜而方輔我光堯萬壽無疆

淳熙十二年加上太上皇帝太上皇后尊號十

一首

大慶殿發冊寶降殿正安

維天蓋高維地克承父尊母親天地難名彊名廣大建號安榮衍登壽殿闡釋皇明

中書令侍中奉太上皇帝冊寶太上皇后冊寶詣殿下用正安

二儀同尊兩曜齊光巍巍煌煌不顯亦彰實茂號榮玉振金相於萬斯年既壽且昌

皇帝奉太上皇帝冊寶授太傅

我尊我親承天之祉壽名兼美家國咸喜公傳秉禮寶冊有煒惟千萬祀令聞不已

冊寶出門正安

羽衛有嚴寶書有輝昭衍尊名鋪張上儀出其端闌由于康遠比屋延瞻歌之舞之

德壽宮冊寶入殿門正安

南山之聳皇壽無窮太極之尊皇名是崇奉茲寶冊於皇之宮皇則受之於昭盛容

太上皇帝出宮升御坐乾安

聖明太上天子有尊玉坐高拱慈顏睟溫震禁嘉承朝弁臚分盛禮縟典遂古未聞

太傅中書令侍中奉太上皇帝冊寶升殿用聖安

天錫伊嘏地效其珍誕作寶典奉于尊親爾公爾相爾恭爾寅協舉令儀遙臻厥成

太傅中書令侍中奉太上皇后冊寶升殿用聖安

坤載有元乾行是順施生萬彙厥德彌盛翼翼母道贊我皇訓相維羣公奉典斯敬

皇帝從太上皇后冊寶詣宮中用正安

大矣母慈德備且純思古齊敬佐我皇文明章茂典金玉其音帝親奉之以翼以欽

太上皇后出閣升御坐用坤安

天相慈皇慶臻壺闈微柔內修壽與天齊既承皇歡載觀母儀懿典鴻名永綏多祺

內侍舉太上皇后冊寶詣讀冊位用聖安

有美英瑤於昭祥金爲策爲章並著徽音德聖而尊備舉彌文億載萬年永輔堯勳

紹熙元年恭上壽聖皇太后至尊壽聖皇帝壽成皇后尊號冊寶十四首

大慶殿發冊寶降殿正安

帝受內禪紀元紹熙欽崇慈親孝心肅祇迺建顯號迺藏丕儀發冊廣庭聲歌侑之

中書令侍中奉三官冊寶詣東階下用禮安

鐘鼓交作文物咸備彤庭玉階天子是蒞咨爾輔臣展采錯事輔臣稽首敢不率禮

冊寶出門正安

巍巍天宮洞開闔闔旗常歲蕤劍佩雜沓寶冊啓行法駕繼發鏤鼓盛典快觀胥悅

冊寶入重華宮正安

仰止皇居九門載闢麗日重光非煙五色雷動萬乘雲從百辟咫尺重霄鞠躬屏息

至尊壽聖皇帝升坐乾安

玉璽瑤編禮容畢具穆穆至尊華殿是御德配有虞紹唐授禹於萬斯年受天之祐

太傅中書令奉至尊壽聖皇帝冊寶升殿用聖安

慈皇天臨睟表怡怡欽哉聖子親奉玉卮鼂扑嵩呼歡浹華裔適臣捧冊是恪是祗

太傅侍中奉至尊壽聖皇帝冊寶升殿用聖安